

**Angajoqqaarsiat aamma ilaqtariit oqilisaasut meeqqanut paarisaminnut  
ilaqutaanngitsut minnerpaamik 25-nik ukioqalereersimasarnissaat  
aalajangersaaffigeqqullugu Naalakkersuisut peqquneqarnissaannik Inatsisartut  
aalajangiiffigisassaattut siunnersuut.**

(Inatsisartunut ilaasortaq Astrid Fleischer Rex, Demokraatit)

**Akissuteqaat**

(Ilaqtariinnermut, Kultureqarnermut, Ilageeqarnermut Naligiissitaanermullu  
Naalakkersuisoq)

**Siullermeerneqarnera**

Naalakkersuisut Astrid Fleischer Rex, angajoqqaarsiat aamma ilaqtariit oqilisaassisut meeqqanut paarisaminnut ilaqutaanngitsut minnerpaamik 25-nik ukioqalereersimasarnissaat aalajangiiffigeqqullugu siunnersuuteqarneranut qutsavigaat.

Nuannerpoq, inuiaqatigiit akornatsinni ilaqtariippassuaqarmat angajoqqaarsiatut imaluunniit ilaqtariittut oqilisaassisutut suliassamik tiguserusuttunik. Meeqqamik paarsineq aamma meeraq aalajangersimasumik aalajaatsumillu atugassaqartissallugu, peqatigitillugulu aamma angajoqqaavisa tunniussinnaasimanngisaannik meeraq asanninnermik toqqissisimarnermillu tunissallugu unammillernartorujussuuvoq. Taamaattumik angajoqqaarsiaanerp imaluunniit ilaqtariittut oqilisaassisuunerup akisussaafferujussuaq malitsigaa, inerisimasuunissamik aamma akisussaassusermik pingaartitsinermik piumasaqaateqartoq. Angajoqqaarsiatut ilaatigut inissisimaneq artornarsinnaavoq aamma misigissutitigut ilungersunarsinnaavoq.

Naalakkersuisut isumaqarput, angajoqqaarsianut aamma ilaqtariinnut oqilisaassisunut, meeqqanut ilaqutaanngitsunut, ukiunut killigititaq pillugu malittarisassamik pingaarnermik atulersitsineq silatusaarnerusinnaasoq. Akisussaassusermik pingaartitsineq aamma utoqqaassuseq akuttunngitsumik imminnut naapertuuttarput, taamaattorli tamatigut taamaattariaqanngilaq.

Angajoqqaarsiat aamma qitornarsiap imminnut naleqqulluarnissaat qulakkiissallugu pingaaruteqarpoq. Naleqqussaaneq arlalinnik aalajangiinermik tunngaveqarluni suliarineqassaaq, ilaatigut angajoqqaarsiat utoqqaassusiat meeqqallu qassinik ukioqarnera eqqarsaatigineqassallutik. Taamatuttaaq ataasiakkaanut naliliinerusarpoq angajoqqaarsiat meeqqat ataasiakkaat atorfissaqartitaat naammassisinnaaneraat. Aalajangiinermi tunngaviusut soorlu angajoqqaatut piginnaasaqarneq, eqqarsartaatsikkut inerisimassuseq, piffissaqassuseq, aningaasaqarneq aamma meeqqat inerikkiartornerannik ilisimasaqassuseq naliliiniarnermi tamarmik pingaartinneqartariaqarputtaaq, angajoqqaarsianngorniarluni qinnuteqaatigineqartoq akuerineqarsinnaassappat.

Kulturikkut naleqartitat qitornarsiap angajoqqaarsiallu imminnut naleqquttuusinnaanerannut pingaaruteqarputtaaq. Pingaaruteqarpoq qulakkiissallugu meeqqat angerlarsimaffiup avataanut inissinneqartut ilaqtariinnut naleqqussarfigisinnaanerpaasaminnut inissinneqartarnissaat, taakkunani meeraq pitsaasumik inerikkiartorsinnaalluarnerusinnaammat.

Meeqqat inuusuttullu pillugit Inatsisartut peqqussutaanni piumasaqaataavoq angajoqqaarsiat meeqqanut paarisassanngortitanut ataasiakkaanut tamanut allakkatigut paarisaqarnissamut

akuersissummik peqartassasut. Siunertaavoq paarisaqalernissaq sioqqullugu meeqqap pisariaqartitaanut tunngatillugu angajoqqaarsiat nukissaqassusiannik sukumiisumik misissuisimanissaq naliliisimanissarlu.

Meeqqanut inuusuttunullu tunngassuteqartuni inatsisit iluarsaateqqinneqarnerannut atatillugu Naalackersuisut siunertaraat angajoqqaarsiannngussagaanni maannakkut piumasaqaataareersunik sukaterisoqarnissaa. Siunertaavoq meeqqat paarineqalissagunik toqqissisimasuunissaat qulakkiissallugu.

Maannakkut Naalackersuisut angajoqqaarsiaqarnermut tunngasut tamakkerlugit sukumiisumik misissuiffigineqarnissaat pilersaarusiortaat. Neriutigineqarpoq misissuineq siunissami suliasat pitsanngorsaanerillu suut atorfissaqartinneqarnermut nalilersuinermut pitsaasumik aallaaviussasoq.

Naalackersuisut ukiuni kingullerni meeqqanut inuusuttunullu tunngasut immikkut soqutigisaraat taamatuttaaq angajoqqaarsiaqartitsisarnermut tunngasut. Ukiuni 2009-miit 2011-mut angajoqqaarsiaqartitsisarnermut tunngasuni pissutsit nukittorsarniarlugit aningaasanut inatsimmi aningaasanik atugassanngortitsisoqartarpoq, ilaatigut angajoqqaarsianut siunnersortinut kiisalu illoqarfinni tamani angajoqqaarsianut najukkami pikkorissartitsisarnermut ingerlatsinermut aningaasartuutit amerlanerpaamik 50 procentiinik kommuninut tapiissuteqartarnikkut.

Siunissami kommunit angajoqqaarsiaasartunik pitsaanagerusumik pissarsiortarnissamut, ineriartortitsisarinnissamut tiggumminniinnarniartarnissamullu pitsaanagerulersinnaaqullugit 2010-mi sulissarsiornermut, ilinniartitaanermut, akuersissuteqartarnermut aqqissuussaananermullu tunngasunik arlaleriarluni pikkorissartitsisoqarpoq. Pikkorissartitsinerni tamakkunani Danmarkimi RUGO-mik pikkorissartitsinernik aallaaveqarput, taakkulu immikkut ittumik ilusiliisarneq malillugu ineriartortitaapput, tamakkunani immikkut ittumik periaaseqarluni kommunini sulianik ingerlatsisartut paaqqinnittarnermut tunngasut aqqissuussaananerannut pisariaqartinneqartunik piginnaasassanik atortussanillu tuniorarneqartarlutik. Nuummi RUGO-mik pikkorissartitsisoqartareerpoq, sulissutigineqarlunilu taakku kommuninut tamanut siammarneqarnissaat, immaqaa nunatsinni pissutsinut naleqqussarlugit.

Qitornarsiat inuiaqatigiinni immikkut eqqorneqajasuusarput. Qitornarsiat ilaqutariinnit ingerlalluannngitsuneersuukkajuttarput, taakkunanilu meeqqap ineriartornissaanut meeraq pisariaqartinneqartutut toqqissisimanermik aalajaassusermillu tunineqarsinnaasannngilaq. Meeqqat paarinerlugaasimasut immikkut paaqqutarineqartariaqarput immikkullu ittunik pisariaqartitsisarlutik. Pingaaruteqarpoq angajoqqaarsiat nukissaqarnissaat meeqqamik taamaattumik paarisaqarsinnaasagunik. Toqqissisimanermik aalajaatsuunermillu meeqqamut pilersitsissagaanni inerissimasuusariaqarpoq akisussaassuseqarluni taamaammallu ukiunik killiliisoqarnissaa siunertamut naleqquttuussalluni.

Naalackersuisut siunnersuut tunngaviatigut isumaqatigaat kisiannili Inatsisartut ataatsimiititaliaat susassaqartut aappassaaniinneerinnissaq sioqqullugu akuersissutigineqartussamik allanngortitsisoqarsinnaaneramik siunnersuuteqartoqarnissaa siunertaralugu suliamik suliarinninnissaannut kaammattorlugit, tassani oqaasertalersorneqassammata angajoqqaarsiaasartut ilaqutariillu oqilisaassisuusartut

meeqqamut ilaqutaanngitsut allanik aporfissaqartitsisoqassanngippat ikinnerpaamik 25-nik ukioqalereersimasarnissaat.

Naalakkersuisut taamatut oqaaseqarlutik aalajangiiffigisassatut siunnersuut isumaqataaffigaat Inatsisartunilu pingaarutilimmik oqallittoqarnissaa qilanaaralugu.